

四庫全書

史部

欽定四庫全書

明名臣琬琰錄卷十四

明 徐紘 撰

河間忠武王張公神道碑銘

楊士奇

王諱玉字世美姓張氏世家河南開封之祥符曾祖某
祖某父天祐皆追封榮國公曾祖妣某氏祖妣劉氏妣
王氏皆追封榮國夫人王初仕元為樞密知院已而灼
知天命洪武乙丑自拔來歸我太祖高皇帝禮遇甚厚

王感奮思效戊辰從征漁海子哈勒哈之地以功授濟
南衛副千戶又從勒布昆特穆爾至延安延州還陞明
威將軍安慶衛指揮僉事庚午從征永順散毛諸洞卒
未逐北敵之侵邊者至鴉寒山而還調燕山左護衛癸
酉追敵之黑松林甲戌征野人等處陞都指揮同知戊
寅朝廷用讒加兵親藩事急太宗皇帝不得已舉靖難
之師惟幄謀畫悉以任王王推誠致慮夙夜不懈事
可否進止衆論紛紜未定者王正色數語決之咸中機

宜故凡舉措必資於玉首用玉策辱北平九門撫順討逆三日城內外悉定師將南出玉曰不先定薊州將為後患薊平餘不足平時薊守州馬宣謀起兵迎拒上命玉討之玉至諭之不下環城攻之宣率衆出戰遂執宣殺之并執指揮毛某玉知其可用釋不殺送詣北平遂撫集軍民是夜急趨遵化豫戒將士止殺曰師行以得民心為本遂簡敢勇士四鼓登堙開其城門將士皆入城中始覺守將率衆拒戰執其將斬之餘不傷一人將

吏悉隨玉上謁遂移師永平密雲皆望風輸款從至灤河玉進曰都督潘忠楊松在莫州阨吾南路宜先擒之上悅遂親發兵命玉為先鋒用其計取涿州雄縣生禽潘楊時長興侯耿炳文率兵二十萬屯真定玉自請往覘之還言軍無紀律且其上有敗氣無能為上至無極以敵衆我寡欲試諸將勇怯召問今舉兵所向且度可必勝否衆未有適說玉曰今當往趨真定彼雖衆然新集未齊我軍乘勝一鼓可破之上曰玉言合吾意吾倚玉

一人足辦明日抵真定接戰耿炳文大敗幾被擒獲其
左副將軍馬都尉李堅石副將軍都尉甯忠及督都顧
成等斬首三萬餘級獲馬二萬復敗安陸侯吳傑軍上
召玉諭曰汝之功也非汝與吾意合不及此永平馳報
江陰侯吳高等以遼東兵攻圍城急又諜報曹國公李
景隆引兵數十萬將攻北平城上與玉謀先援永平既
至高等望風棄輜重遁玉從上追之斬獲甚衆玉言大
寧去此不遠請移軍襲之可免後顧從之遂從攻大寧

自辰至午城破斬其都指揮朱鑑執都指揮房寬下令
安撫城中頃刻而定北平報李景隆兵圍城遂旋師玉
請先攻其營然後歸援從之徑擣景隆營大戰三日城
中亦鼓譟出表裏夾攻景隆軍不支大敗遁去從攻廣
昌蔚州進攻大同悉下諜報景隆收潰散卒號百萬且
復至玉言兵貴神速先事者勝請往駐白溝河以逸待
勞可必勝也上命王率衆馳往駐三日景隆兵至玉以
精騎馳擊之斬馘無算景隆復大敗收餘卒退保濟南

乘勝追擊圍其城既而解圍還攻瀘州獲其大將徐凱
進攻東昌敵列陣決戰上以數千騎繞出陣後敵圍數
匝上以衝擊而出王不知上所在突入敵陣大戰連殺
百數十人王亦被創而歿十一月二十五日云春秋五
十有八上哭之慟既旋師諸將皆侍語及東昌事上曰
勝負兵家常事不足計所恨艱難之際失張玉良輔吾
至今寢不帖席食不下咽隕涕不已諸將皆泣上既正
大統行報功之典顧侍臣曰張王才備智勇論靖難功

當第一惜其蚤歿贈奉天靖難推誠宣力武臣特進榮
祿大夫右柱國追封榮國公謚忠顯進封其三代考妣
仁宗皇帝在春宮數與侍臣言張玉識見謀畧卓然老
成非諸將所及且端方匡直之益誠難得也既嗣位加
封河間王改謚忠武告於廟以配享太宗親製祭王之
文有秉義懷忠一心為國靖難之際發謀奮勇百戰當
前所向風靡大功垂成挺身陷陣惟義所在視死如歸
忠精貫於星日功烈揚於竹帛之褒蓋王為人莊重果

毅涉獵書史明其大義而識慮高遠治家禮法秩然奉
命行師紀律嚴肅與士卒同甘苦未嘗妄戮一人每語
麾下曰為將當滅血戰袍流芳汗簡蓋其殉國之志素
定古名將何過焉配王氏樞密院判執中之女累封王
夫人子男三長輔起武功累進奉天靖難推誠宣力輔
運佐理武臣特進光耀大夫左柱國英國公太師監修
國史知經筵事功德茂碩為國元臣次輓神策衛指揮
使次軌錦衣衛指揮同知女一永樂中冊為貴妃孫男

六長忠授勲衛次鑑次瑾次斌次集余陪太師公在史
館經筵久以余永樂洪熙從臣實聞二聖所嘗論王者
應銘神道之碑乃敘而銘之銘曰文皇奉天中興邦國
桓桓忠武奮起羽翼帷幄密勿長策深畫上契淵衷魚
水之得義旗肇舉仗劍先驅敍城九門功其權輿取薦
遵化如探穴雛執其抗鋒摧朽折枯龍馭既南大旆在
前連下雄鄭邇奮常山長河無險鐵城不堅撫降殲逆
德威並宣決志敵愾逞恤厥躬精誠貫日勁氣吐虹聊

城之鑿髮忽上衝先軫戰旗千載一忠王勞在國王績
在史王嗣象賢益闔以偉帶礪山河廷有明誓清廟陟
配逾千萬祀

成國朱公東平武烈王神道碑銘 楊士奇

天命仁聖為下民主必生文武材畧恢傑弘偉之士為
之輔翼相與協力一心靖暴亂致治平以建非常之功
夫肇創之績難矣中興尤非易也故前史贊勲臣率以
肇創中興並言若我太宗文皇帝龍興北藩安社稷於

將危保皇業於永固其功蓋又有難者以一隅之衆而應四方強盛之敵靡堅不摧靡剛不馴固自天之所定亦必有材畧恢傑弘偉之佐以效夫疏附先後奔走禦侮之能是以大功之成勃然莫之能禦也若時東平武烈王其偉然特出者乎王姓朱諱能字士弘世家鳳陽之懷遠曾祖考某妣某氏祖考某妣某氏父亮從太祖皇帝征伐有功累陞武毅將軍燕山中護衛副千戶謹持行善撫士有譽於時母某氏王生有令質自少喜讀

書事父母至孝洪武甲戌襲父職事太宗皇帝於藩邸
小心慎恭未嘗少懈而撫恤下人一如其父甚為上所
信任朝夕侍不去側奉天靖難之師初興惟幄密議惟
河間忠武王與王預焉時北平三司之交構造禍者王
與忠武建議率麾下首擒之遂奪城九門撫綏城內外
三日人心大定引兵攻薊州禽其將都指揮馬宣等遂
取遵化永平密雲從上攻灤河既還從充雄縣首破其
東門敵衆敗走追及於月漾橋執其總帥都督楊松潘

忠等復追其餘衆于鄭州斬獲不可勝計乘勝長驅入
真定大敗長興侯耿炳文兵時王獨與敢死士三十餘
人追奔至滹沱河炳文衆尚數萬復列陣向王王奮勇
大呼衝入敵陣敵衆披靡自相蹂躪死者無算棄甲來
降者三千餘人上大悅賜書褒諭永平馳報汪陰侯吳
高以遼東兵攻城急王從上赴援高遁去王追及之多
所殺獲遂從定大寧戮其拒命撫輯其衆而還時曹國
公李景隆率兵攻北平城王從上至鄭村壩與景隆兵

遇大戰敗之進攻其營又敗之景隆兵列營九門者連
敗之城中亦出兵夾擊景隆狼狽走王從攻廣昌蔚州
大同次第悉下景隆復收潰散之卒號百萬來攻上親
擢之王為前鋒午至白溝河敗其都指揮平安軍及申
又與敵兵戰大敗之明日王領左哨當前鋒又大敗敵
盡克其砦敵盡走保濟南王率衆追之至錚山敵嚴兵
列陣以待王連破之敵衆釋兵降者萬餘人王以間上
悉撫而縱之蓋自是敵兵戴德皆願來歸無復鬪志然

上得之即遣之不留王從攻滄州先破其東門入城斬首六萬餘級敵震懼遂獲其總帥徐凱進攻東昌敵列陣決戰上以數千騎出陣後敵圍上數匝王奮力翼上以出進戰夾河王為奇兵先鋒大敗敵將盛庸兵又敗平安兵於藁城追奔至真定戰其東門斬首萬餘級遂彰德及定州勦西水寨已而敗敵將李文於德州遂克東阿東平破汶上諸寨設伏淝河敗平安兵十萬餘進戰小河為敵所乘稍却諸將遽請旋師獨王力勸上行

曰用兵未必常勝豈可因小挫輒自沮項羽百戰百勝竟
亡漢高屢敗而終興自殿下舉兵以來克捷多矣此小挫
何足置意但當以宗社為重整兵前進耳上撫掌歎曰爾
言深合吾意遂行至靈璧敵盛兵迎戰王先登陷陣大敗
之生擒其副總兵陳暉平安參將馬溥徐真及都指揮三
十餘人獲馬二萬敵衆死者屍蔽原野降者數十萬人悉
縱遣之進克泗州渡淮敗盛庸兵遂克盱眙下揚州從上
渡江入京師內難平諸王臣民推戴上承大統論靖難功

王居首賜號奉天靖難推誠宣力武臣特進榮祿大夫右柱國左軍都督府左都督封成國公食祿三千五百石子孫世襲賜誥券追封三代考皆成國公妣皆成國夫人永樂二年命兼太子太傅四年安南黎季聰弑其國主毒虐下民拒遏詔使數諭不悛遂發兵討罪命王總兵佩征夷大將軍印率左右副將軍左右參將及神機橫海驃騎游擊鷹揚五將軍兵八十萬討之瀕行上親送之龍江師至廣西上顧侍臣曰朕夜察天象西師有憂其未能乎然能

足辦斯事朕第慮氣候非其所習耳踰旬訃聞上震悼輒
視朝五日一時同王從舉義者永康侯徐忠等十數人皆
入奉慰上洒泣曰方艱難時協心一力相濟能其首也且
其素存心行事皆應遠到曷遽止此言已益酸楚左右皆
流涕莫敢仰視蓋王至龍州嬰疾薨十月初二日也春秋
三十有七上親為文祭之宸衷悲愴溢於言表讀者皆為
泣下謚恤特厚追封東平郡王賜謚武烈并加贈其三代
皆王爵仁宗皇帝臨御特詔王配享太宗廟廷賜祭之文

尤極褒重蓋當時元功之首也王頑然魁碩勇力過人器
宇宏博知識高遠雍容端重辭氣溫裕廣坐羣議王折衷
之詞簡理當無不心服善馭將士教訓撫恤親若父子紀
律明肅無敢踰越每遇勁敵大呼馳鬪以一敵百敵皆望
風辟易懷綏降附恩惠周至出謀制勝靡有遺策尤善用
才人卒歸心雖古名將不過是也葬昌平北澤山之原配
王氏屢封東平郡王夫人子男若干長男襲封成國公
太子太保孫男若干永樂初某侍講禁林凡軍國事預

陪廷議恒與王接知之有素至是太保公屬書神道之碑敬叙而為銘銘曰明聖之興天寶命之必有名世輔翼攸資文皇大聖奉藩恭恪天將啟之內難奄作有不得已義旗載揚彬彬文武風雲奮興于時東平雄才弘畧夜寐夙興密待惟幄刈違撫順式宣德音環城中外有截一心金戈所向漁陽風靡永平不固大寧傾圮復顧無虞前驅翩翩折朽雄鄭摧堅中山益都追奔滄州殲逆咸奮先登電掃霆擊青齊既帖踊躍而南持志決

往宗社為心靈璧疾下長淮飛渡茫茫圻甸有迓無拒
大江無險內難廓清翼龍升御天開日明國有元良遂
兼儲傳端肅之行寬仁之度南交弗靖奉命徂征師未
出疆大星墮營天不憖遺堂柱遠仆帝聞盡傷卹與隆
厚忠存社稷勲載簡編偉哉嗣興顯顯象賢河山有誓
追崇有詔皇明萬年永配清廟

定西侯涇國武勇蔣公神道碑

錢文通

蔣周公之裔以國氏漢末有諱子文者淮南人仕為秣

陵尉逐盜至鍾山而亡大著靈異隆於祀典子孫散處于淮岱有間人而公其裔也然未有如公之顯者公諱貴字大富楊之江都人父從龍當元之季以義勇附太祖起淮甸洪武十一年隸燕山中護衛侍親王之國即太宗也公生有大志恒念父功屈人下甫冠即伐後三十一年舉義克雄縣攻大寧戰戰鄭村壩取廣昌蔚州白溝河戰勝圍濟南回取滄州戰夾河藁城克西水寨敗敵將平安軍于肥河戰靈璧收泗州遂渡江入京師功

成論次自十夫長陞至昌國衛指揮同知後征交趾四
征沙漠敗阿嚕岱于九龍口洪熙元年復至大松嶺禽
殺敵衆陞都指揮僉事調掌彭城衛事宣德二年四川
松潘夷叛以公充右叅將率兵捕之首慕鄉道從東路
險絕處攀緣而進賊驚曰兵從天上来那一日戰十數
合以全勝聞賜勅有奪橋斬關如古良將之譽明年陞
都指揮同知鎮守密雲諸關番夷復叛仍充叅將討之
尋陞左軍都督僉事充副總兵公謂夷性變詐非長驅

撲滅患未可弭乃大閱士連破黑虎等四十餘寨斬首
千五百級生禽稱是投崖箐死者無算夷遂寧謚賜勅
獎諭陞都督同知充總兵官佩平蠻將軍印鎮守其地
凡事有利害悉奏罷行之就威州千戶所建州治興儒
學使知所教列屯而耕易木柵以從遠近堡壘相望使
知所守廩庾以足人心大安正統改元召還陞右都督
時西徼偽王阿勒坦等寇甘涼邊將屢失利命公佩平西
將軍印率京營五千騎征勦凡陝西及甘肅涼州等處

官軍悉聽節制兵至鎮番出魚兒海子哨還時部長巴圖博羅率衆犯莊浪公命將禦之生縛博羅等百餘人謀報阿勒坦也伏河西遂躡踪倍道至亂山奮勇衝入且追且殺至石城泉斬首二百餘盡獲其馬駝衣械時有逃奴來言阿勒坦所在公議即往副將李安沮之公拔劍厲聲曰汝任邊寄肉食且數年坐視其縱橫不制尚掉三寸舌以撓我師敢復諫者死乃策馬前馳見賊遂整陣而前生禽男婦數十人送營謀復知其不遠令軍士

疾走至烏魯斯猝見彼牧馬遂約衝馬羣以鞭擊箭橐聲
驚之馬盡佚敵既失馬皆挽弓步戰不決既令衆躍馬
揮刀齊入以旗牌手督之遂大捷內擒一畊譯審自石
城泉敗歟止餘八百精勇者公得其情乃分為掎角勢
列五百騎為左石翼縱百騎登高峻疑之既遇賊夾擊
轉戰逾九十里阿勒坦窘死西土遂寧捷聞遣中官齎絲
段白金宴勞封奉天翊衛推誠宣力武臣特進榮祿大
夫柱國定西伯食祿千二百石給世襲誥券封追其曾

祖三公祖八公父從龍皆定西伯曾祖妣楊祖妣杜妣程皆伯夫人留鎮甘涼四年召還以雲南麓川宣慰思任發屢寇邊六年命公充總兵官佩平蠻將軍印賜蟒袍銀盔甲以行公與總督兵部尚書王驥至雲南衆謂瘴發不宜進公謂尚書曰賊毒吾民甚可坐視耶遂遣兵勦之賊勢稍却師集金齒分三路進而公與尚書從中路合上江兵夾攻會南風大作縱火四焚矢石俱下如雨公乃擐甲鼓勇而前賊大潰斬首一萬餘級地盡赤

移屯騰衝賊據木籠山為連寨環山塞流又驅象為陣
合數十萬人于馬鞍山公悉破之勢如拉朽直擣巢穴
蕩無遺氛賊父子僅以身遁凱還詔戶部侍郎王質持
羊酒迎犒臨清至則上親慰勞遣中官賜金幣羊酒于
家擇日御奉天門設教坊樂部勞平夷功陞定西侯三
代考妣復封如其爵賊父子既遁聞被擊于緬甸八年
命公與尚書下緬取賊仍寵賜以行時緬人數報送
至而潛以金樓船載賊離五十里而不至尚書謂公曰

此給我也遇江則絕我歸路且瘴癘將發不垂此而翦之可乎于是誘緬人聽賞公則往焚其舟大戰一晝夜其賊首已先去賊子思機發之在孟牙者亦遁去盡俘其妻孥象馬以還破其寨二百餘處斬夷遂平九年還上復親宴勞加祿二百石賜白金百兩綵段十表裏楮幣一萬貫金酒器二副鞍馬一疋以寵異之公之子雄見賊去亟率漢遠官軍三十人追殺不及而賊已阨其後衆寡不敵某日刎沉于江時年二十四其十人亦從

之死上嘉其忠勇贈懷遠將軍彭城衛指揮使十二年
烏拉遣使來朝謀者知托克托布哈及額森候使回即分
兵入寇上命公總兵禦之公至境嚴耀威武遂引去召
還嘉勞甚至十四年正月二十一日忽感風疾薨于家
距其生洪武庚申十一月二十九日享年七十訃聞上
震悼罷朝遣禮部尚書胡濱等諭祭前後十四壇及賜
齊糧孝布明器等物追封涇國公謚武勇命工部營兆
域于榆河鄉泥井里先塋之次而以其年七月六日葬

焉既葬越月衛喇特復寇遂有土默特之變使公在豈遽至是哉其冬以公之孫琬襲爵掌左軍都督府事成化初佩平羌將軍印充總兵官節制甘涼諸軍既而守備南京管中軍都督府事忠毅簡亮克繩祖武而雅好文學達古今事變為時所倚重父葬後二十五年而隧道之碑未立琬狀公勲績來請予雖不獲接公然慕公威望久矣而與嗣侯交且久聞公性淳厚體貌豐偉平居謙退如不能臨陣則奮勇敢前以一當百故起自徒步

建立殊勲追封三代列爵五等與國咸休也可不載諸
聲詩勒諸金石而使之顯示永久哉初公娶李繼李皆
贈封侯夫人子男五長義患足疾以琬封定西侯後公
七年卒次即雄次謙次讓次諫女五長適杭州前衛指
揮使李剛次適密雲衛指揮使劉容次適後府左都督
長子馮泰次適羽林前衛指揮使李秀次適富峪衛指
揮使張勇孫男五長璟蚤卒曰琬曰琰曰瑾曰瑜女五
武強伯楊能會昌長子孫璉永庸侯長子徐昌道化衛

指揮使張璵其婿也銘曰皇明開天六合重輝累惟蔣
公世際龍飛起自淮甸繼奮燕山義旗所指克濟于艱
天位既正屢進其職從定交南復征迤北維彼北方擾
我邦垌公往禦之西涼以寧蕞爾麓邦負固連釁公復
勦之南荒以順爰自左樞超登五爵貂蟬峩峩為時李
郭龍章鳳誥三代同封鐵券金書世永彌崇公之忠勇所
向無敵三邊之靖戎昭帝極茂績方殷公忽長逝天子
興嗟有贈有謚有祭有葬有嗣詒孫有謀以燕翼

子生榮死哀時孰儼焉公雖云歿遺風凜然榆河之鄉
泥井之里琢石刻詞以彰來裔

翼城侯孫公神道碑銘

楊榮

世之宏傑英偉之士遭遇聖明屢建勲績致有名爵老
而復能感激思奮竭忠貢勇力效勞勸弘濟艱難其光
烈著于當時聲華及于後世者吾于故應城伯孫公見
之公諱巖字闕世家鳳陽之于皇里曾夫父某大父某父
重四三世皆務本力穡周貧恤患鄉以善人長者稱母

周氏有懿德公生元至正己卯十一月十有一日幼時
有術者異其狀謂其親曰是兒不凡宜善視之既長性
豪爽膂力絕人輕財好義為族里愛重元季兵興仗劍
歸太祖高皇帝于淮甸在軍中以驍勇聞已未從渡江
克采石定金陵取兩浙自是南取江廣北定中原咸與
有功擢金吾左衛百戶調守鳳陽已而陞武德將軍燕
山中護衛正千戶洪武庚申從太宗皇帝之國于燕公
誠直不欺甚見親信藩國之事多委任焉乙亥公引年

致政而以子亨代已卯太宗舉義靖難以公宿將知兵
特起守通州是歲南兵大至城圍數周起土山臨城攻
西門燬樓堞公率衆極力捍禦城賴以完未幾兩軍合
戰公操戈身先士卒大呼陷陣士氣爭奮追奔逐北斬
馘不可勝紀得饋運船三百餘艘貨糧無算以功陞明
威將軍指揮僉事仍鎮通州辛巳兵復至攻城益急公
勵將士登城力戰矢石交下敵乃退走論功陞都指揮
僉事壬午春南帥平安督遼東兵十餘萬逼城公語將

佐曰彼衆我寡若城守不出自示弱也不若及其始至而擊之彼必敗亡乃率敢死士數百犯其鋒而城上亦合勢大譟安衆大潰自是敵兵無復來攻者是歲六月太宗入正大位以通城屏蔽冀方使六師南進而無北顧之憂者皆公之功于是進封奉天翼衛宣力武臣特進榮祿大夫柱國應城伯歲食祿千石給誥券子孫世繼自曾祖考而下勲號諸爵皆如公封曾祖妣而下悉贈夫人永樂戊戌六月二十日以疾卒于正寢享年八

十計聞太宗悼念不已命有司給棺殮治墳塋遣官致
祭贈翼城侯謚威武歲十月葬通州東馮家村之原配
劉氏封夫人先公卒子男六曰亨曰忠曰旺曰喜曰泰
曰榮亨由都指揮僉事襲公爵女二長適武德將軍正
千戶徐亨次適昭勇將軍指揮使房斌孫男十五人英
傑敬玘貴瑞琳勉斌建禮智綱雲綸英襲父爵早世傑
今嗣為應城伯孫女十四人一適太師英國公男忠一
適金吾衛指揮桑華餘幼在室曾孫五人公歿塋二十

有二年傑奉公之事行謁予告曰傑賴先祖餘休嗣膺
封爵顧墓道之碑未立無以昭功烈垂不朽乞不斲而
畀以文庶後世子孫知先世成立之難兢慎自持不敢
廢墜厥家予昔獲侍太宗左右備悉公之勲績有可書
者今傑又具述公始終之詳謁請益堅義不容辭乃叙
次于右而系之辭曰明明太祖順天應人舊自淮甸汎
掃烟塵公于是時仗劍來附從多羣雄克用其武功成
位升弗究厥施武德之階養銳蓄威太宗龍潛天鑑明

德內難構興皇怒斯赫乃張義旗乃舉義師起公于家
知公有為言言通城寔國屏蔽命公鎮之邦域之計維
公桓桓振我師干士勇民和戰克守完東兵之來其勢
十倍薄而擊之一鼓而潰京師既寧四方既平皇命報
功顯爵是膺礪山帶海金書鐵券子孫繩繩碩大蕃衍
維公之功惟皇之德世其承之有永無斁馮村之原峨
峨穹碑用詔後人刻此銘詩

明名臣琬琰錄卷十四

欽定四庫全書

明名臣琬琰錄卷十五

明 徐紘 撰

昌寧伯壯敏趙公墓誌銘

尹直

國朝膺天御宇百二十載內安外寧豐亨熙豫固由聖
明繼作於上而亦文武夾輔於下之所以肆惟英桓果
毅之才宏偉頑碩之資入則纓冠佩玉位保傅儀百辟出
則綰章持節總師旅敵王愾使朝廷有所恃而安遠方

有所憚而不敢發者蓋世有其人焉若太保兼太子太傅昌寧伯趙公其一也乃茲已矣嗚呼惜哉公諱勝字克功姓趙氏系出漢充國之裔世居河朔至伯父赤考再興國初始徙家永平之遷安遂占籍焉太宗文皇帝靖難師興赤以謀畧從征有功授永平衛百戶歿于戰陣無嗣再興襲陞千戶永樂庚寅北征大破其帥巴雅實哩殺敗阿魯岱餘衆陞指揮僉事洪熙改元復以征北功陞指揮使尋卒公襲甫髫齡賴母王夫人夫節教

育底于成立恒思父遺言我生為壯士而志弗就爾長
須努力報國亢宗母負奇男子也由是刻志勵行事母
極孝敬始終無違禮正統己巳北兵入京畿公率兵出
西直門扼其衝突躬履戰陣斬馘無等敵遂奔遁景泰
庚子擢僉都閫名以發聞英廟復辟錄公舊勞加僉前
軍都督府事佩刀侍衛天順戊寅選管三千營操辛巳
秋曹孽叛逆公擒獲居多遷都督同知時北兵深入陝
西固原公闕參將率師往勦敗之今上嗣統命兼勇

營典操推恩給誥進封榮祿大夫褒榮三代成化乙酉
重建永天門公董軍應役既訖工適山西邊徼有警命
公佩平西將軍印統軍來援次鴈門關報兵已遁乃還
明年秋往征延綏河北兵聞風渡河趨大同納款入貢
師旋即命典操耀武營戍子夏故元兵暨海西諸夷弗
靖廷議請以公總鎮之乃佩北征前將軍印杖節以征
至則申嚴號令簡閱軍士調度有方屢奏克獲賜勅獎
諭辛卯春召回總典五軍營壬辰春調千三營是夏至

甲午秋兩奉制勅佩印總帥北征敵輒遠却丙申總督
軍士濬築京城垣塹兼葺西直門城樓陞後軍都督府
左都督戊戌冬加太子太保癸卯秋勅封昌寧伯歲食
祿千鍾丙午冬加太保兼太子太傅丁未春皇貴妃萬
氏薨奉勅董工造墳于天壽山之西南朝夕督視觸冒
寒暑遘疾輿歸遂不治是歲七月朔也訃聞當寧惻然
哭悼特賄鈔三萬貫給麻苧白布有差輶視朝一日勅
所司為造塋域遣官諭祭者屢追封昌寧侯謚壯敏卹

興渥矣公生永樂庚子後正月之朏享年六十有八曾祖寶山祖保父泊俱贈榮祿大夫同知都督府事曾祖妣閔妣王及原配李繼冉俱贈夫人先卒葬昌平縣太平鄉之原子男一瑄以舍人選侍春官詔賜冠帶先公一年卒女二長適都指揮白璽次適定西侯蔣公仲子駿孫男三長鑑恩授冠帶次鉞次錫女三曾女孫二俱在室鑑卜以卒之秋八月二十日奉公柩啟夫人之封窆焉前事具公世出行實請予銘維公早薨勲階烷子

乃克篤志奮興閑習武畧涉獵儒書累膺簡命佩符建
節東征北伐英威勇譽聳聞中外所至敵輒聞風奔遁
靡敢抗迎乃不窮追遠襲僥功啟釁所謂不戰而屈人
之兵厥功懋焉矧平居總操督工簡教有方卹撫周至
士卒感悅立朝行已慎重無違縉紳推敬朝廷倚重凡
奉勅遣出辭還見有白金文綺寶鑑餼醴之錫蟒衣玉
帶歲節恩意尤多而卒也贈襚塋祭封爵加謚有隆無
殺始終榮哀何其盛哉余與公同朝久知公深去秋叅

典邦政兩偕公考閱武學官舍諸生相歡竟日益見公之忠亮端凝信為國之干城而於古之名將奚忝然則銘於予宜銘曰皇明奠安泰山盤石曰惟文武篤棐勵翼桓桓趙公系出充國世有聞人儲休委澤粵若公考早世充職從我文皇勛階累積公自幼孤式克修飭武畧究通體貌軒特兵寇及郊慨然舉檄乃率虎旅乃肆鷹擊乃僉都閫英譽炫赫先帝錄勞崇登顯陟出則總操入則侍直今上倚毗寵恩彌益屢佩印符屢奉制勅

東征北伐所向無敵或聞風遁或受俘馘恬不邀功邊
不啟隙惠周司徒威龍警遠域帝曰汝勝久樹勛績予維
汝嘉其進封伯公拜稽首曰敢忘德報德維何委身戮
力營星俄隕尚勞敷役訃聞九重良深痛惜卹典渥優
哀榮何極太平之原鬱鬱松柏撮跡勒銘永責寃冤昌
寧之號於昭千億

戶部尚書陳公神道碑銘

王 儕

成化壬辰夏六月辛卯南京戶部尚書陳公以疾終于

位令制凡兩京文武大臣喪朝廷必遣官諭祭命有司營葬至於勲業位望之焰灼者又益以賻贈之禮凡此皆公所宜有而必得者南京戶部既以公訃聞其叔子鵠遂奉柩去歸其鄉以俟命焉公諱翼字冲霄鳳陽虹縣人其先居朱陳村宋季徙彭城今居虹縣者又徙自國初祖敬先考鑑皆以公貴累贈資政大夫南京戶部尚書祖妣妣皆夫人公幼有異質先考尚書公指以語人曰吾家世農業人知吾所治者稼而不知者種德吾

兜其稼之獲乎宣德壬子中應天府鄉試宣德丙辰會試中進士第授行在戶部主事歲己巳北兵侵邊王師北征命往永平等處備芻糧永平圻內郡征輸繁重民無宿儲公多方區畫民不厲而兵饒給還奏稱旨復出內帑金數萬兩命糴粟遼陽實邊廩竣事陞郎中尋奉璽書督江西先是歲賦皆卒伍漕輓朝廷因用武乃復更以民有司承望風旨嚴程趣辦民殆弗堪公曰賦無後期足矣奚以亟為乃循行郡邑求得其富厚者俾具

舟分漕且諭之曰此一時權宜爾師還當無爾勞衆樂從焉景泰初上崇孝敬錄忠義備財用清賦罰申舊典體羣臣六事未報聞尚書公訃乞歸三司御史交章留之上命公卒事公遽已馳歸喪次聞命往督漕抵京師乃復歸服幾終會上命廷臣舉堪任方岳者僉以公對即其家拜山西右布政使馳傳赴任公問民疾苦為蠲其逋稅至十餘萬石素民利五臺山木至是有禁公弛之樵蘇自若鴈門既設兵守禦益戍以民咸釋之使歸

農業公既厚民生謂可以役其力矣始於某暇日築忻
州城除道通平西嶺又感發其良心俾脩陽曲諸廟學
蓋民不知勞而頌有德者至多不容口英廟復辟召還
拜都察院右副都御史給從二品祿巡撫寧夏時西邊
連歲用兵民罷敝甚公拊循之又籍其貧甚者計口給
食奏蠲逋租之累里正者寬兩稅抵輸布帛厥貢果實
皮革諸物皆乞權罷之其地故有宣聖廟祀禮與中州
等頃歲儉行釋菜公曰其為費幾何而用以化導邊氓

其利溥矣俎豆之事吾何敢廢亟復之時西番入寇邊將失利其勢猖獗公乃檄諸部固城堡繕器械募材武士為土兵叅以官兵守要害既而朝廷命將出師敵始引去西師解嚴公乃上章乞省墓不允然上亦念公在邊久思有以少休之矣未幾陞南京戶部左侍郎今上即位勅公總督京儲及屯田諸務公始至會臺臣建議令諸司察舉其屬公首劾罷其不事事者數輩而薦用其才且賢者廩庾廢壞其修復之資咸取具軍役而公

有餘財則積以待敝公曰靡有用之物困無告之民吾
不能牽於吏議以隱忍於心也即日以便宜從事人謂
公一舉而能除數十年弊復因灾異上卹民力錄囚徒
裁省鹽糧俸鈔三事丁繼母憂賜葬祭旋命起復公懇
乞終制祥禫召還京陞南京戶部尚書總督如故三年
乞奏最上以其兼領諸務止之賜誥命進階資政大夫
公至是功業既成精力向衰任他人若可以少自暇逸
而公感知遇期於盡瘁每晨興入公館治事食頃詣臺

近日盱未休屬僚文移趣辨不少貸卒之以此成疾疾甚猶日省署不廢嗚呼必如公而後可謂無負於委任矣公為人嚴偉立朝稜稜有風望自為郎署人已憚其剛直無敢有忤之者及出更藩鎮入踐臺省位叙日高年德日茂晚生後進以得公接納為幸而小官下吏趨走聽令有莫敢仰視者矣公生於永樂甲申壽六十九配李氏封夫人側室樊氏朱氏五男子鳳沂州判官鸞虹縣陰陽訓術鵬義官皆李出鵠國子生樊出鷄朱出

三女其長者嫁郭宣錢宗季在室孫男五公之卒也其
同年友南京吏部尚書崔公既經紀其喪復述公履歷
以授鵠俾持以乞文於予將立碑神道予雅辱公知愛
公之妣丈夫人喪嘗忝執筆為銘今於銘公又奚辭其
葬以卒之年十一月壬寅其墓在邑西南沱河之陽銘
曰維古大臣以道事君道用於時惠利在民烈烈陳公
遭逢列聖煌煌兩疏詞嚴義正豈不公用人孰究知其
所知者公之緒餘秉德懷誠初終一節何歎於公元侯大

肇沈經夏丘爰墓其陽勒銘穹碑永永不忘

副都御史盛公墓誌銘

丘濬

英廟復辟之初權臣之冒功者朋比為奸鑿空起邊釁
欲樹竒功以蓋其迹率師關塞即還敵因乘之而入十
三道御史欲有言同事有洩之者彼先入愬于上誣御
史中有與被繫內臣張永同族者欲為之報復以激上
怒即逮所誣御史下獄明日衆御史章始上上御便殿
召衆入盛氣待之擲章付御史誦之至半上曰止摘章

中所條事析之令其分疏復諭之以終誦上意稍悟然重違權臣意姑從輕典凡列名者俱謫外任其一人錫山盛公也時掌河南道事出知保定之束鹿縣先是權啟邊釁其勢焰可畏人無敢言者惟公首與同官涑水張君鵬謀謂事干軍國某等官臺憲烏可畏禍不言張公以為然即入謀之兵都給事中王鎔約以章交上機事因之而失時聯官者皆未知也亟召入永平周公賓倉卒誦所上章者音洪亮畧無阻滯及對上之言詞直

理正天下聞而壯之而不知首啟其謀者盛公也同日出補外者若干人其後惟盛公年最高官最顯而能以令德終嗚呼天於忠臣之報固獨厚之耶公諱顥字時望常之無錫人正統辛酉以尚書蔡氏傳得雋京闈在太學十年所交皆海內知名士景泰辛未始登進士第首擢河南道監察御史尋以老成掌道事時初經已之變朝廷憲前政委靡之失稍開言路一時言事者毛舉細故攻訐陰私以張直聲公獨顧大體惜人才掩其

疵疾不為已甚善類賴之嘗兩奉命出按淮時值歲大
歉發倉廩貪全活者甚衆按閩時適當大比拔賢振滯
是科得人為盛及是首謀摧折巨奸直聲凜凜聞天下
其知東鹿也邑多顯宦往往怙勢為不法聞公至相戒
曰是嘗劾奏石總兵者其人不可犯也公變搏擊以為
撫循吏畏而民安之未幾丁內艱去民留之不可俟其
服闋相率詣闕乞公公得再任不復用刑法有爭訟者
諭之以理輒叩首聽受不復辯鄰邑聞之訟多年不決

者各來請判于公公折以片言各心服而去時人有清如水明如鏡之謠邑介真保間四境之民雖非所治亦聞趨赴郊外有荒地自然聚以城市邑人風因目為清官店既去任民築亭為立去思碑請文士為作記至今存焉歲甲申推守邵武行所無事不動聲色而郡大化既而巡撫都憲以延平民狡而事繁請于朝移公治之延平與邵接境聞公政有聲素莫不革心向化巡按御史錄公兩郡政績請旌異于朝進公一階封贈父母及

妻癸巳陞廣西叅政專督糧餉丙申陞雲南右布政使
丁外艱服闋改陝西尋遷左時廣西殘破之餘公委曲
措注民夷賴以不擾陝西地臨三邊公在任日邊報無
虛月適歲多歉公調度有方而餽餉不缺入為刑部右
侍郎佐其長以明刑恒舉歐陽公求生不得則死無憾
之語為察屬告有深文巧詆者輒不樂之刑用是平僅
再閱月調公南京蓋當道者之鄉人有欲得公處者或
以為言公乃曰吾南人往官于南固其所也明年山東

旱飢盜賊將乘之而起廷議建遣大臣巡撫僉曰無如
盛時望者改公都察院左副都御史乘驛往命至公即
日就道甫下車禱于天雨即大至枯槁復甦公多方設
法凡前人救荒之政於今有益者次第舉而又因時之
宜條數十策行下所司民賴以賑濟卹之餘所儲尚百
餘萬又有餘力以及於前代聖賢有功於齊魯者為之
建祠宇以報祀之公山東之政大抵以黜貪暴表忠良
除苛政以固民心為本在山東者三年齊俗翕然以變

年近七十以老疾上章乞致仕上以其情詞懇切從之
馳驛歸至徐州適所部有大獄以公知其始終有旨命
鞫之獄成後歸公自家食時家事一以付其弟頤至是
抵家伯仲怡怡友愛加篤公於家事一不問頤為之構
方塘書院疊山鑿池蒔花植竹以為娛老之地公時靜
坐一室焚香讀書以自適泊如也歲丁未以上皇太后
徽號恩進公一階家居者六閱寒暑以歲壬子正月二
十六日卒享年七十有五訃聞賜奠祭如例卜以是年

臘月六日葬於惠山之原弟頤命其子虞持狀來京師求予銘按狀盛氏常州右族世多聞人曾大父諱茂之大父諱子實父諱文珪俱以公貴贈都察院左副都御史祖妣吳氏妣馬氏俱贈淑人公配三娶殷氏贈淑人顧贈恭人何封淑人子男二唐義官龍蔭補國子生女三人孫男二銘釗女四曾孫男一女二銘曰公為循吏仁中自義公為憲臣義中有仁公撫邦國變荒為熟公佐邦刑於死求生撮其功業所在烈烈曰鉅而艱摧折

大奸因銘及之補史之遺

浙江按察使楊公墓誌銘

楊守陳

天順初英廟復辟時廣西道監察御史楊公印馬于畿內民羣訴太監吉祥忠國公石亨奪其田若干頃公具以聞併言其怙寵擅權之罪詔稱公敢言稱職命吏部記之蓋將以大任也既而還京彗孛連見祥亨二凶日益張十三道御史謀劾之有私泄於亨者乃與祥合謀上諧暨彈章入上震怒召諸御史詣文華殿俾誦彈章

而厯詰之某道御史周賓與公同輩且誦且讀厯陳二
凶罪狀明甚然天意入先譖莫能回悉下錦衣衛獄逼
誣引大臣刑甚慘酷數瀕死卒無一語他及有司文致
坐公死而十三道長皆坐戍餘多坐貶奏上矣會京城
大風雹拔木壞屋走正陽門下馬牌於郊外於是獄皆
從減死者戍戍者貶貶者復而公就戍遼東之鈇嶺道
遇赦還或謂公宜詣二凶謝庶免後禍公不可復謫戍
廣西南丹居五歲二凶相繼以逆誅公被特旨還里居

今上嗣位以言官奏復公舊官改陝西道尋陞浙江按察副使居父憂起復舊治巡海後陞按察使卒于官自古亂臣逆黨必先淫刑重法以籍羣衆之口而懾服其心俾莫敢不從然後逞其志此二凶所以必欲寘公於死既而公幸生全二凶卒皆誅滅而公乃復于位由天子之明足以別忠邪智勇足以定福亂故也公姓楊諱瑄字廷獻南昌豐城縣人其始祖曰王君權唐季相南平王累官金紫光祿大夫居南昌之武寧傳十有五世

曾祖回仲猶王姓國初徙豐城占籍始訛為楊蓋其方言王楊無異音故也公祖名高不仕父子榮以鄉舉累官蜀府左長史母周氏公以甲戌進士為御史僅兩期而罹二凶之禍再起為御史歲餘遂副憲于浙杭州衛指揮陳鼎父子肆凶惡海寧民管箎沈琦工詆誣皆莫敢誰何公悉寘之法屬府造上供紙歲若干萬工估價每張銀一兩公計量纖悉減十之九歲省銀若干萬兩民德之其巡海道以軍官多役戍卒嚴禁之立五日一

操點之法以邊餉米糲而卒空為革勢豪攬糧之獎奏
增一通判專理以武臣多不學無諳為葺學延師教其
子弟凡城隍墩堠廝署舸艦兵甲皆以次繕葺之無遺
餘力及定海之城北捍海塘縣西走馬堤霏衢所之東
外海塘健跳所之海塘海鹽縣之大海塘皆修築之以
奠邑居以興民利而海鹽塘踰二千三百丈工尤鉅禦
患尤大非公莫能為也在杭州以按察司卑隘逼塞迺
徹舊宇改創數百楹穹鉅偉麗闢其前衢廓然四達以

西湖舊深廣能溉諸邑田至十六萬頃今湮過半奏請浚深之如舊防於湧金門址闢水門放湖流入城河出清湖閘抵海寧黃灣以溉十六萬頃田復於畏吾寺前後建三橋以通水門俾小舟常入湖取淤泥以濬深可久不湮功雖未就慮則深遠矣公巡海數歲波恬風息成化丁酉春忽報倭船數百犯邊公時在杭寮察驚問公徐曰彼果來犯吾將盡誅之乃出巡至寧波府衛已戒嚴守令呼民壯授甲林立矣公謂曰海上甲兵自足


內地不須虞安用民壯今農事方殷亟散之至定海數日迺方倭僅兩船入貢耳於是皆服公之智量其為按察司以憲度久弛力振之嚴門禁察吏奸斷訟明敏無留獄禁官署母桑蚕以爭民利諸婦女母入寺觀以隳風俗甫半載而病作寮家往問尚與論築海塘之法浚西湖之利無片言及私成化戊戌七月朔日卒年纔五十有四耳公疏爽有志節喜建功業又才足勝之視天下事無不可為者然賦命不永而止此無不惜之公娶

許氏封孺人生三男長源縣學生次淮次潤側生一男
滄最少卜以某年某月日葬某山原以余與公有雅持
憲副胡君漢狀請銘余讀狀至天順間二凶事為之慟
哭流涕不能已豈獨為公悲也哉嗚呼正統之末社稷
非景帝莫可保而一時竭忠殫勞者皆可謂社稷臣也
二凶于是時亦受恩不貲富貴極矣而勞蔑如逮景泰
末誠可謂惠懷無親者矣天下非英廟其誰歸而二凶
者貪天之功弁髦景帝魚肉其社稷之臣殆盡此余所

謂慟哭流涕而不能已也嗚呼二凶是舉豈但要功以
固位而已哉蓋以圖改玉之兆也於是勢焰炙天孰敢
一睚眦之而公露章顯斥瀆死而不易辭可謂忠讜之
臣矣曾不數年而二凶者身刑家戮遺臭無疆而公乃
高陟令終流譽千載豈直薰蕕之辨而已哉嗚呼使二
凶不自作孽則國家無釁而富貴延及于來胥未已公
非以忠讜著則須有他表見豈能若今之焯焯後世決
不可泯哉是亦足為萬世人臣之至戒至勸矣余修國

史既嘗書之然春秋之法辭之重言之複必有大美惡
馬故因源請重書之併及其勲業之著者其他文與行
皆畧之銘曰人與萬物生天地中惟厥性貴不與物同
父子之仁君臣之義是惟綱常允不可離有或離之以
肆厥欲宜兩其翅宜四其足策名委質以服事人有死
無二是名曰臣烈烈揚公事我明辟豸冠繡衣實有言
責視彼跋扈害國殃民忍不能默飛章奏陳彼日鴟張
志將改玉凶焰炙天莫或敢觸公草白簡以率其僚厯

數彼惡願肆諸朝尺威之嚴國典之極濱死不渝厥心
惟赤為國之故以忘其身是曰忠讜庶幾臣誠瀕死而
生入幽而顯帝心孔昭天道不遠公有巨才亦有嘉行
有學有文有繁厥詠我皆畧之不書于石獨揚一忠以
勵百辟華嵩可夷滄渤可湮惟忠讜臣億載不泯



明名臣琬琰錄卷十五

欽定四庫全書

史部

明名臣琬琰錄卷二十六至二十一

詳校官侍講臣陳萬青
刑部郎中臣許兆椿覆勘

總校官編修臣王燕緒

校對官待詔臣胡士震

賸錄監生臣何彤

欽定四庫全書

明名臣琬琰錄卷十六

明 徐紘 撰

鎮遠侯夏國武毅顧公神道碑銘 楊士奇

永樂十二年五月二十五日鎮遠侯顧公薨於貴州訃聞上震悼遣官賜祭追封夏國公賜謚武毅贈如制命有司治喪葬遂命其嫡孫興祖襲封興祖奉柩歸葬于揚州之閼原顧之先居湘潭公之曾大考百四妣

某氏大考于二妣朱氏始家江都考萬一妣周氏公諱成字景韶天性仁厚自少能矜恤鰥寡負直氣遇以橫逆加人者必摧辱使畏服乃已其大考嘗詫於衆曰是孫必興吾門公資貌魁偉涉知書通大義而膂力絕人善武事尤精騎槊射命中元未嘗遊燕都有強寇十數刦其舟同載者皆驚愕公獨奮出鬪寇皆披靡走既歸張士誠起泰州僭王號公知其無能為已未我太祖高皇帝渡大江明年公來歸附至鎮江皆號勇士十一人

轉鬪八城莫敢嬰其鋒者既敵益衆而援絕悉為城中人所縛十人者皆被殺公奮躍起縛絕蹴持刃者仆之脫走歸語衆曰鎮江城中皆庸夫可取也遂導衆攻其城克授百戶從攻常州宣州皆克之遂簡充旅正還從克江陰從寧河王克通州陞千戶攻雙刀趙於樅陽攻安慶江州池州興國諸山寨皆下之庚子敗陳友諒兵於龍江公得其戰艦及馬特賜白金友諒退仍據安慶江州公隨大將軍悉復之并得其八陣營諸寨從克南

昌援安豐敗元兵進攻廬州從克武昌荊州衡州從間平王下襄陽還取泰州留守興化從中山王破舊館克湖州薊州洪武元年陞堅城衛指揮僉事一年領軍克信陽唐光四年從臨江侯取西蜀道遇敵公手殺敵百餘人生擒二十餘人進攻羅江生禽其偽元帥及其下二十餘人悉送軍門斬以徇入漢州偽官戴丞相向知院者盛兵迎戰公揮衆奮進戴向皆狼狽還走追北至城郭圍其城竟降之蜀平調成都後衛總帥以公守之

六年率兵赴重慶禽妖賊王玄保及僞萬戶李邦祖等
八年調貴州衛明年甕傍等山寨蠻寇叛公率兵討之
斬首百餘級俘獲人馬尤衆夷懼服叩首請歲納租賦
公從之其僻遠山峒有負固未下者次第平之已而僻
夷叛服不常公連歲出兵平之前後俘戮不可勝計十
四年從平川侯征雲南率步騎兵為前鋒首克普定
留公守之且為後繼公部將士樹柵以守明年公出兵
克西堡於是諸蠻合數萬攻圍普定諸將皆欲出戰公

持不可曰賊衆我寡一出則為賊所窺必俟其擊柵乃出賊及柵公披甲上馬出北門率戰士奮進手殺賊騎之迎戰者十數人賊衆引却諸將遂乘勝出東門西門戰敗賊衆時南門之圍未解公取所生禽者十八人斬而縱其一人歸曰吾以夜二鼓時及救爾矣及期賊聞官軍舉銅角銃鎗皆惶懼奔走圍悉解獲賊甲兵無算時有中使在普定見公勇畧絕羣還奏特遣賜龍衣金帶陞世襲指揮使凡普定所麗諸蠻公悉平之十七年

平阿黑螺惲等十餘寨及降尾灑蠻首馬乃之衆兩堡
蠻携貳復平之二十一年總戎檄公討平乖西扒古里
谷勞金網等寨遂禽闕索嶺首賊葛蓬及叛寇阿東皆
誅之土官阿宗叛焚劫驛舍乘虛將攻公勢張甚時官
軍精銳悉駐東川公率餘衆及土兵深入賊地據關口
屢敗之賊既遁衆以暑瘴非士卒便欲退師公不聽未
幾賊黨殺阿宗降遂奏革普定府而黜其守之懷二心
者建兵衛以屬其民析其地為州三長官司六而公統

理焉自是公悉意撫綏大布恩信諸夷向服廿五年夏入朝賜文幣二十有關副鈔二千貫白金四百兩且賜宴會同館陞鎮國將軍貴州都指揮使司同知公至貴州首征康佐叛蠻破阿老諸寨峒廿七年平都勻豐寧西梁瓦村等寇斬首萬四千餘級俘生口三千八百有奇而撫其良善二十九年陞驃騎將軍右軍都督府僉事官其長子統普定衛指揮使是歲命公佩征南將軍印總兵征水西叛寇生擒賊首敬德斬之餘寇悉降三

十年五開蠻反公率兵至臻剖大峒悉破之進勦天柱
天堂春花金井蒲頭大小坪等生苗及榜蠻米毫灣溪
萬潮等寇皆破之三十一年普定西堡及貴州光金谷
勞古里金石番羨唐諸夷復叛公次第親行誅其叛首
而撫其餘衆以歸明年高廟上賓又明年太宗文皇帝
靖難之師起北方公受命往禦至真定靖難之師縛公以
獻文皇識公先朝舊人解其繫與之語曰豈非皇考之
靈以爾授我乎因語以不得已興師之故言已泣下公

亦泣遂遣人護送北京令輔仁宗皇帝居守時姚廣孝奉命輔居守有腹心之寄姚素不習兵事與公議多不合會南兵圍城仁皇於軍旅調度恒從公言城中文武之臣競進日顧城南將其中莫測不可專任然公所言計皆合幾用皆有效數命公出將兵固辭曰使臣侍左右日陪論議得效分寸足矣賜公甲胄刀劍弓矢公皆不受南兵數圍城卒以敗去者多用公謀也洪武三十一年九月論公功賜號奉天翼運推誠宣力武臣特進榮

祿大夫柱國後軍都督府右都督封鎮遠侯食祿千五百石子孫世襲賜錢三千貫白金一百兩綵幣三十四副遂賜誥券是冬命公鎮守貴州蓋以公威信素行於彼云永樂元年春至貴蠻夷聞公至歡起出拜叛者皆歸境內靖寧公上書論大計謂國家宜早建儲以正名分北邊官軍有功者爵賞既定宜制以禮法降勅褒答賜錢五千貫綵幣八加副申賜鈔萬貫白金二百兩綵幣如前三年賜誥追封三代考皆鎮遠侯妣皆侯夫人

永寧土官宣撫為其弟謀殺致其下亂公執其弟送京
師罪之而從土俗奏以宣撫妻襲職其衆遂靖六年車
駕將巡狩北京豫召公副儲君監國既至上慰勞再四
且諭所以召公之意公言皇太子仁厚恭勤明達足任
付託且左右文武之臣其智識深長皆非愚臣所及蠻
夷雖今帖服小有所爭即持兵為亂愚臣非敢決意去
留惟陛下命之上付知公意嗟嘆累日賜鈔四萬貫白
金二百兩綵幣三十有六副命還貴州陞辭文華殿曰

殿下於事君父恤兵民素行有誠惟於小人當寘度外
萬事有天理不足計蓋是時懷奪嫡志者不樂公在京
師公獨知故先幾引去也時土官奏欲為公建生祠從
之公之赴召也播州貴州蠻作亂公歸遣子男率兵勦
之悉平時恩州臺羅等蠻亦亂公遣人諭其酋普亮即
服於是公病事聞遣醫馳視竟不起春秋八十有五公
自少壯履行陣挺身戰鬪奮勇無前雖身被十數創不
稍引却必致俘馘見功效深於籌畧料敵制變百不爽

一於謀國事明大體不瑣屑細故竭誠奉公至老死不倦諸葛公所云鞠躬盡瘁死而後已者公蓋有焉朝廷既追封公并追封三代考皆夏國公妣皆夏國公夫人元配彭氏再追封夏國夫人繼室穆氏李氏子男七長統先公卒洪熙中以其子貴追封鎮遠侯次銑次銓次銳次勇累官貴州都指揮僉事次亮次源孫男九興祖襲封鎮遠侯效用三朝克繩祖武凱再興德旺興能貴州衛指揮同知先卒琮琦竑曾孫男六玄孫男一至是

興祖具事狀屬士奇書神道之石士奇永樂洪熙中官
翰林日侍二聖實聞公事故不辭敬次第書之而係以
銘曰大明奉天肇迹淮土公奮從龍來歸皇祖金戈鐵
馬桓桓四征雖暴効強疇之敢櫻函夏既寧報功錫命
崇爵豐祿往綏南境逖彼南境毒虺妖狽憑阻弗馴跳
蹶嘯呼公奉天威霆驅電掃夷數室穴屢征乃安乃登
督府乃衛禁垣居無幾何遄北其轍天祐公俾爾聖
輔惟聖知公曰時舊老明明二聖任公心腹蓄疑盈庭

公任愈確公不尤人公處有道秉誠執恭謀猷屢告卒
底厥功為報益隆金貂玉輶亞于上公帝謂爾成子懷
南徽汝往申撫公拜奉詔夷獠迓公父母歸止焦者以
濡仆者以起孰其悖兇敢干刑誅小者擒俘大者戮屠
公身在外心存廷陛匱函有陳皆國大計當寧聖明嘉
公忠言寵賚華褒誕自天降國有老成謂宜百歲曷不
憇遺營星奄墜雄蓋萬夫智名勇功公福簡簡哀榮始
終慶澤之貽綿緜來嗣駕念先祖祇于世世

陽武侯鄧國忠武公神道碑銘 楊士竒

宣德五年五月太保陽武侯薛公奉命城隆慶永寧赤城獨石竣事將歸以疾聞上遣中官以御醫往視且賜勅諭勞至京猶力疾入見上慰諭再三既歸第日賜御藥遣中官臨問無幾竟不起七月廿三日也訃聞上震悼親為文祭之追封鄧國公賜謚忠武詔有司治喪塋凡墓喪之儀皆優等蓋特恩云公諱祿姓薛氏世家山東膠州之新興社曾祖考諱安妣劉祖考諱大妣金考

諱遇林妣張公兄弟六人公第六自少傑特有大志未
冠籍我伍上官皆奇之從北征金山及哈勒哈之地又
從征迤都山諾爾布哈等處自是屢出西北二邊涉萬
里而還太宗皇帝舉兵靖內難公首從義旗攻九門克
薊州遵化援密雲攻雄縣追敵漢州咸奮勇先驅以一
當百戰真定公生禽敵左副將軍騎馬都尉李堅超陞
燕山右護衛指揮僉事賜白金文綺從援永平攻下大
寧富峪會州寬河時南兵已圍北平城公還先遇其哨

騎薄戰敗之車駕繼至從戰鄭村壩敵大敗陞指揮同
知從克廣昌蔚州攻大同率兵前哨獲敵人馬遂從南
征大戰白溝河追奔至濟南陞指揮使從克滄州大戰
東昌公以五十騎前哨遇敵兵數百與戰敗之獲馬三
十餘疋敵悉衆來追公復奮戰大敗之獲馬二百餘疋
敵於威縣及深州伏兵以要旋師皆擊走之從戰夾河
大捷戰滹沱河右軍力屈公率衆馳起之出入敵陣數
十合戰敵敗走公追至夾河斬首領無算獲馬五百餘

定明日戰單家橋公馬蹶為敵兵所得拔刀斬敵兵復上馬督戰遂敗敵將平安軍以次攻下順德大名彰德及攻西水寨公生禽敵都指揮一人斬獲尤多從攻東阿東平汶上皆下之繼戰淝河大酒店小河汴隄靈璧率勇先諸軍遂渡淮渡江從車駕入京師太宗皇帝為臣民推戴既正大位論功行賞陞驃騎將軍後軍都督府都督僉事以其官秩贈三代永樂六年陞都督同知八年從車駕北征至玄冥河以功進榮祿大夫右軍都督

府右都督兼左軍都督府事以其官秩贈加三代時四
方選至幼軍數萬悉命隸於公操習十二年從車駕北
征十五年初建北京宮殿命公董營繕十八年成加奉
天靖難推誠宣力武臣特進榮祿大夫柱國封陽武侯
食祿千五百石追封其三代皆侯爵賜誥券三十一年
從車駕北征是年八月仁宗皇帝嗣大位加公太子太
保子孫世襲侯爵奉命巡北邊適敵入雲州公率兵追
至大松嶺斬獲甚衆事聞賜勅嘉獎遣中官及鴻臚卿

即軍中勞之既還賜白金鈔幣加歲祿五百石洪熙元年佩鎮朔大將軍印率師巡北邊宣德元年庶人高煦反車駕親征命公為前鋒先二日圍其城罪人既得留公撫綏城中軍民還賜銀幣甚厚明年秋從車駕巡邊出會州邂逅敵至塞下與戰敗之生禽其部長獲其餘衆遂鎮薊州永平冬還賜銀幣加厚四年率師護兵餉開平者再五年春佩鎮朔大將軍印巡邊至奇黃嶺遇敵拒戰悉斬之盡收其家口孳畜陞太保賜鈔幣居二

月董築城之役蓋從公之言以便戍守公平居無事未嘗忘危每計邊務言之亹亹或謂其瑣屑者終不為變蓋其志奉國惟恐不盡為將勇智兼備嘗先事籌畫用心之至以夜繼日故所嚮成功未嘗敗北間一二臨陣中矢石裹創赴鬪有進無退其率師所過紀律嚴明秋毫無犯而撫恤士卒人人歸心若董繕作規置有方力不煩費功率堅久人亦罕及蓋一代之興必有一代之臣公祇事三聖涉厯多用志篤鞠躬盡瘁以效臣職故

能建功國家流光簡冊致身貴富垂慶後昆其非古名將之流而今之不可多見者歟公壽七十有三其配李

累封至侯夫人子男三以是年十月三日葬公于閼鄉

閼原銘曰明聖之興有命自天必有輔翼名世之賢

氣機翕會雲龍風虎有勲有烈左文右武桓桓薛公始奮從義大呼迅馳金戈鐵騎智明幾先勇蓋萬夫疇其膺之折朽摧枯宗社載安功書冊府在帝左右股肱心膂公於事上一誠不貳知竭臣職死且無怠公於馭衆

有紀有綱撫如春和令如秋霜歷事三聖麟衣蟬冠廷
有老成國有屏翰丹書鐵券傳襲來裔公如長城曷不
百歲英靈升遊九原在此太史作銘式昭無已

永康侯蔡國忠烈徐公神道碑銘 楊士竒

公諱忠字仲達姓徐氏世家廬州之合肥父諱用元季
守宣城我太祖皇帝兵至宣率衆歸附命仍其職遂從
征討以功實授管軍百戶從守南昌進武畧將軍河南
衛副千戶洪武壬戌自陳老疾命公代之丁卯從征北

方至哈勒哈之地還城大寧無幾調大寧備禦戊辰從
征金山之衆之為邊患者屢戰敗之獲其馬牛輜重賜
白金鈔幣庚午運兵餉數十萬解赴溫口遂從征諾爾
布哈大敗其衆俘獲其人口萬餘總兵遣公護送入闕
公悉心撫恤俘者如歸陞濟陽衛世襲指揮僉事乙亥
城懷安萬金丙子率兵從征北方至驢河而還丁丑
往鎮開平己卯太宗皇帝舉靖難之師公首從義旗克
密雲克雄縣真定取永平克大寧還戰鄭村壩取廣昌

薊州戰白溝河皆有功進攻濟南克滄州大戰東昌及
夾河攻彰德破西水寨克東阿東平汶上大戰靈璧遂
從渡淮及江至京師公臨戰奮勇百夫莫當出入敵陣
率在衆先白溝之戰敵揮刃斬公兩指未殊公自斷指
擲地梨衣帛裹創仍奮進戰其馭士卒撫恤誠至人人
歸心而號令嚴明所過無擾上行師恒飭諸將無妄殺
曰吾奉天弔民厲民違天何望有濟公承命惴惴惟執
兵迎拒者不容而誘諭招俫綏撫附降多効力焉其以

功進官自指揮同知厯都揮僉事指揮奉天靖難推誠
宣力武臣特進榮祿大夫柱國前軍都督府左都督永
康侯食祿千一百石子孫世襲賜誥券追封曾祖六二
祖七九及考皆永康侯曾祖妣陶祖妣王妣張皆永康
侯夫人永樂己丑暨癸巳車駕巡狩北京仁宗皇帝監
國上以公敦厚老成留之南京兵政一以任公公小心寅
畏清靜簡易上下咸宜之一日夙興盥櫛衣冠坐都督
府得風疾遽卒癸巳八月二十四日也上在北京聞訃

震悼輶視朝一日遣官賜祭給賻命有司治喪葬追封
蔡國公謚忠烈并加封其三代皆蔡國公妣皆蔡國夫
人配亦蔡國夫人仁宗皇帝在東宮遣祭賚賜甚厚公
沉毅質恪有孝行旦暮出入必先詣家廟事繼母敬愛
兼至少有訓責必跪受雖貴不變所得上賜必謹視之
約已守法未嘗有過接人謙恭和氣滿容語簡而誠洞
見底裏春秋五十有二而卒卒之歲十一月二十七日
葬江寧縣安德鄉長岡之原子男二安山壽安襲侯爵

安奉國子祭酒貝公泰所述事狀求文刻神道之碑士
奇與公同朝十有餘年後同侍監國相厚知公之行加
詳故為序而銘之銘曰桓桓徐公為時虎臣襲家之勲
奮武以振天啟聖明義旗爰舉提誠來從股肱之輔皇
麾所指公迅前驅誰抗誰禦拉朽折枯神武不殺公行
聖志未迓來歸撫綏勤至仁施如春義行如秋公實左
右威懷並流範範既安氛翳咸廓宗社再隆褒功命爵
愴幅無華厚重靡遷貂蟬充廷孰愈公賢鑾輿北狩聖

儲監國時武以衛孰優公德肅肅小心溫恭靖嘉歸焉
老成為國之華維孝維忠在公允蹈宜貴宜富曷不耆
耄都門之南聿崇起墳過者下車視茲刻文

平江侯恭襄陳公神道碑銘

楊士竒

太宗皇帝初自北藩靖內難至江上都督陳公瑄具兵
迎濟內難平上正大統錄功賜公奉天翼衛推誠宣力
武臣特進榮祿大夫柱國封平江伯賜誥券陳氏家合
肥公字彥純自少穎敏不凡好善惡惡內篤孝行洪武

中侍父官成都習兵畧精騎射以武臣子選侍大將嘗
從出郊外遙望孤鴈雜鵠羣命衆從者射不中最後命
公發一矢斃之有鷁翔于上命公射應弦而墜自是屢
試皆奇中衆大服而公不自為能朝廷命總兵者作蜀
府宮城遣將伐材於山所行失律又材不中度又所經
瘴地士多死總戎察公可用遂命之公善撫綏明號令
別取善道七百里以入先期而還士不病所得材皆適
用總戎者嘉之又命董繕作具有條理遂從征南番嚴

州亭中及散毛鎮南咸建勞績代父職為成都右衛指揮同知父坐舊累謫戍遼陽公伏闕奏請代行特詔父子並免復職衛卒數輩饗餉詖挾制上下為衆患公次第悉去之善類以安從征越窩討建昌首長裕魯特穆爾踰梁山平天星寨破寧番諸蠻駐西河口諭降夷人數千從總帥復征鹽井平三山寨及小伯夷進攻卜木瓦寨據要害立堡以斷賊路官軍分三隊進公居中已而左右兩隊弗克奔還公所統僅百餘人冒險先登賊

數千圍公公下馬率衆且戰且斫賊疲稍却公亦傷足
裏創進戰自己至酉賊敗走公全所統南還復從征餘
寇賈哈喇時寇衆數萬據險以拒官軍分三道公軍後
進由番西涉打中河得間道乃出奇兵作浮梁渡河既
渡撤梁以固士志遂壓寇境寇憑險迎敵一日十三戰
奪其險明日復力戰凡七合寇大敗遂入其壘簡銳卒
出哨令望見前軍旌旗即舉砲俾知已敗寇仍遣五百
軍斷寇走路寇窮出降械送賈哈刺于京師撫輯其餘

衆公及麾下皆被陞賚從蜀獻王巡邊招撫邊夷兼理
茶馬之政邊人悅戴灌口都江堰壞民苦水患公修其
堤防躬督工作為堅久計矜恤無告出貲置義田二百
畝於成都積所入租凡貧不能衣食不能婚嫁及死不
能殮葬者皆給之會雲南兵征百夷以功陞四川都司
都指揮同知遂進右軍都督府都僉事太宗皇帝知公
才可任時北京軍儲不充命公歲董運百萬石道海給
之公惜置井井創建百萬倉於直沽尹兒彎城天津衛

籍兵萬人戍守公善任使均勞逸秋毫無取於下凡漕
途奸弊掃滌一清漕舟所經海島夷人畏憚官軍悉閉
匿公下令俾出為市而遣官監臨平其直軍無敢譁人
兩便之舟還值倭寇刦沙門島公率衆追至朝鮮境上
焚寇舟殆盡寇以殺溺死者甚衆奉命率舟師於閩海
備寇倭者三海溢坍沒隄岸起揚之海門歷通秦北至
鹽城凡八百里奉命以四十萬卒修之航海至者茫洋
莫知所停泊往往膠淺公於太倉相可泊處以二十萬

卒築高丘三十丈延亘十里為表識衆便之稱寶山事
聞上親製文樹碑焉既建北京罷海漕浚濟寧臨清河
通南北往來仍屬公董餉運建議造淺艤二十艘初公
歲運二百萬石為之有方後增至五萬石國用以足若
疏清江浦引水由管家湖入鴨陳口達淮以免淮河風
濤之患就管家湖築隄亘十里以便引舟浚儀真瓜州
二墳潮港之堙鑿呂梁徐州二洪石以平水勢築沛縣
刀陽湖濟寧南望湖長堤開泰州白塔河通大江築高

郵湖隄隄內鑿渠亘四十里以通舟南北建梁以便陸行自淮至臨清相水勢高下建暉四十有七以時啟閉皆舟楫通行永遠之利於淮濱作常盈倉五十區以貯江南輸稅於徐州臨清通州皆建倉以便轉輸慮漕舟昧河淺深自淮底通州濱河置倉五百六十八所舍置卒俾導舟可行處緣河隄鑿井樹木以便夏月行者凡於事慮之周而為之果仁宗皇帝初臨御下詔求言公首言七事大槩謂南京國之根本宜為久遠鞏固之計

選將益兵以嚴守備長民長兵皆宜擇賢能然後政舉而下不失所賢能在推舉推舉在覆實乞選朝臣之公正者分巡天下考察百司政事得失進廉能黜貪鄙則官得人而治可興今府州縣學教官多不得人乞令風憲考察罷黜別選今中外軍伍多缺蓋由所管頭目私從擾害不勝致其逃逸乞勅都府兵部都司嚴切禁約就行清理老疾者令戶下代逃逸者責限追捕戶絕者驗實除豁伍籍又邊防之要在兵食足近歲如開平等

處城不足兵兵不足食所守何由完固乞選武官之有
方畧者授以精兵足其衣食給之堅利器械俾日教習
如有沃壤令兼務耕守今漕運惟江西湖廣浙江及蘇
松諸郡去北京甚遠漕河又有洪牀淺凍之阻往復踰
年襍費數倍正糧上逋公租下妨農務乞自今令運於
近便淮安徐州等處收貯別令官軍運至北京則民力
可蘇農務不妨各處官軍每歲漕運畢後財力殫乏到
家又修理壞船運來歲糧勞勤可憫其所管頭目又加

別從以重因之乞行禁約今後漕運軍士不得再有別
役馬船快船惟二三百料者可行於漕河所載不過五
六十石每船已有額設水夫今又於緣河拘集軍民聽
候甚至接遞聽候日久衣食艱難有至行丐者乞自今
罷之上覽奏嘉嘆命有司咸即施行賜勅獎諭有老成
忠愛之誠之褒加之重賚賜誥追封其曾祖某祖某考
某皆平江伯曾祖母祖母母妻皆夫人命子孫世襲宣
宗皇帝臨御命公鎮守淮安兼督漕運公至察宿弊之

為民厲者悉革之豪猾奸宄皆斂避境內以寧時已嬰
疾而躬勤旦暮靡有滯事疾間入朝深被嘉勞賜宴賚
還至淮安無幾復作上聞特勅勞問時子儀在侍衛令
挾醫馳驛往侍竟薨宣德癸丑十月十一日也春秋六
十有九訃聞上悼嘆輒視朝一日追封平江侯謚恭襄
賜祭命工部營塋公為人閨穎英毅弘度偉畧稠人廣
會談論亹亹輩推服公餘披閱載籍考知往古成敗
治亂之故喜近逢披士時相講議善交際能推利為義

所至以濟人為心多所建置人用德之不忘家有樂善堂恒舉鄒孟氏仁義忠信樂善不倦之語以勉子孫子男五位襲平江伯後公數歲卒次儼次儀令為勲衛次倫次侃孫男三裕今襲平江伯墓以薨明年之三月墓在江寧縣大山之原余與公同朝三十餘年相知且好於是儀以狀求著神道之碑故按狀叙而銘之銘曰繄公挺出何桓桓武兼勇智追前聞材藝夙試卓寡倫峨冠三品承考勲靈谿獠洞獫猖羣負險弗憂寧且趨公

奮掃刮迅拔塵前滌舊俗寧邊民有截譽望齊峩嵐歛
徵來東衛宸垣遭承興運效駿奔錄勞疏封昭鴻恩詔
蟬鑿玉衣繡麟報賜志企古蓋臣殫心畢慮靡夕昧滄
溟茫洋渺涯濱歲增萬艘奄然臻有梗于海威赫震斬
鯨戮鱣焚甲鱗崇表海岸亘長雲雲章龍彩天垂文南賦
北貢艱以辛踰淮歷濟底天津疏涇鑿堅劬且勤坦行
如砥戚者忻猗嗟公篤孝與仁厥施諸時績弗泯愛國
亦有嘉謨陳功載冊府被後昆大江之陽歸有墳太史

銘之昭不泯

明名臣琬琰錄卷十六

欽定四庫全書

明名臣琬琰錄卷十七

明 徐紘 撰

西寧侯宋公神道碑銘

楊士竒

永樂五年七月某日推誠輔運宣忠効力武臣柱國後軍都督府五都督西寧侯宋公終於肅州訃聞天子悼歎遣官賜祭勅有司給傳還其喪明年夏至京師葬聚寶門外其考之塋之次公諱歲洪武中所賜名其字景

賜宋世家鳳陽之定遠元季我太祖皇帝龍興壬辰公隨父朝用兄國興來歸明年從克濠州又從戰敗賈魯父兄並以功授萬戶甲午從張天祐克五河泗州盱眙又並進總管乙未從上克和州渡江下采石太平總管邵榮等潛有異謀國興察知以聞榮等伏誅從克溧陽進攻南臺國興戰沒命公襲兄職丙申從攻陳也先水寨克之遂從克南臺公父陞廣德元帥丁酉隨廣德公克宣州還改廣德公天寧翼元帥以老留建康公從鄧

愈克徽州受功賞戊戌召入侍衛己亥襲天寧翼元帥
庚子調征饒州及江西諸郡以次平賜襲衣文綺命充
總兵官平諸山寨洪武元年克建寧隨留守禦新定官
制實授武德將軍建寧衛正千戶四年陞懷遠將軍建
寧都指揮使司都指揮同知冬召還陞江西都指揮使
九年調大同授龍虎將軍十一年調陝西所至治兵撫
民不嚴而肅十二年掌涼州衛十三年逐北兵至白城
獲其人馬甚衆十五年父病詔公還侍又三年父沒既

襄事復鎮涼州敵時數為邊患公率兵討之追至額齊
訥之地斬其渠魁伊蘇爾戰等及其衆無算餘悉生摶
送京師時又招其國公吳巴圖等萬八千人而送其
部長格布達爾等百五十人詣京師簡其壯者隸卒伍
餘悉處之善地俾耕牧自便驛召公還京獎諭再四賜
賚甚厚復鎮涼州十九年召還陞驃騎將軍左軍都督
府督都僉事賜鈔文綺以其官贈其三代仍鎮涼州二
十三年夏遣中使就賜白金及鈔至秋復三遣賜鈔文

綺授制諭充總兵官征哈瑪爾破之哈密者去肅州千
餘里敵所城也時誅其王子必璫齊等三十餘人獲其
衆千三百人及金印一銀印二悉送京師所獲馬牛羊
咸給將士二十五年復充總兵官征罕東西番叛寇誅
禽七千五百餘人獲馬二千五百牛羊十萬遂還京師
二十七年調中軍都督府是歲敵入遼東命充副總兵
率兵討之遇戰諾尼江獲其衆千餘馬倍之明年廣西
憐憘諸寨連結為亂命充右副總兵往征之誅擒七千

餘人賊平還京又明年總羽林八衛兵往平五開龍里
十三洞之寇三十一年率師城萬全諸衛歸二年出鎮
甘肅太宗皇帝初臨御公朝京師陞後軍都督府左都
督永樂元年授平羌將軍充總兵官仍鎮甘肅三年北
兵日益聚近邊公遣人諭以朝廷德意其部長巴圖特
穆爾溫都爾呼率部衆五千馬駝萬六千來歸邊境底
寧事聞勅賜獎諭命都督徐膺緒尚書趙祉持節即軍
中封西寧侯賜推誠輔運宣忠効力武臣柱國仍後軍

都督府左都督食祿千一百石加賜田若干頃又二年
以疾終享年闕 公曾祖闕 贈闕官妣闕氏贈闕夫

人祖闕及考皆再贈闕官祖妣朱妣陳皆再贈闕夫

人公之配丁氏許氏皆封西寧侯夫人子男闕人闕

瑄府軍右衛指揮使琥駙馬都尉尚安成公主瑛駙馬

都尉尚咸寧公主永樂中琥襲西寧侯仁宗皇帝嗣位

琥坐事改命瑛襲西寧侯孫男闕

傑金吾左衛指

揮使偉羽林左衛指揮同知俊天策衛指揮僉事儀旗

手衛正千戶佐龍驤衛正千戶嗚呼公勲著國家貴聯
戚里慶澤被于後嗣名聲施于無窮固本於際遇聖明
千載之幸會亦必其忠義之行闊遠之材克勤始終有
以遂承之矣既述其事於碑文系之銘曰天建皇明龍
興淮土魁智傑能如雲從附定遠密比猶漢沛豐父兄
偕來有偉宋公義旗所嚮仗劖先驅神武不殺迎降惟
呼長江飛渡金陵定鼎分命股肱出委四境于宣于歛
于番于閩公從總兵聲威日振甌寧既靖公留奠之進

奠藩垣大江之西雲中在左分陝在右公來鎮撫煌煌
旌棨敵窺西陲公往遏之斬繫其渠招懷其餘繫兵遼
陽驅除嶺表如燎滅枯如鐵摧朽馬跡所歷幾周四遐
桓桓之志無康于家文皇御臨親任舊老自西來朝蒼
顏白首天子曰嘻卿宜在庭紓予西顧孰愈乎卿公曰臣
職及臣未衰西人忻忻迓公復來鞠躬盡瘁遑敢怠寧
邊人恃公屹然長城宣上德恩洽于遐外耄倪畢歸如
川赴海天子曰嘻維時茂勲崇爵豐祿予慰乃勤維公

遭際實多父兄偉績賢稱晚而益閑存沒榮哀歸從先
兆來世莫京繇公所肇墓道有石其崇九尺太史述銘
永耀無極

涇國襄敏陳公神道碑銘

金幼孜

公諱亨字闕 姓陳氏鳳陽壽州人生而奇偉有大志
元季為揚州萬戶時太祖高皇帝龍飛濠梁歲丁酉遂
仗策叩軍門上謁高皇帝竒之選為鐵甲長從大將常
公征秦州破張士誠軍獲乘馬而還戊戌冬從車駕攻

婺州拔其月城陷陣先登有銀器金幣之賜由是以驍
勇聞遂定浙東諸郡洎征安慶太平高郵皆效勞績壬
寅春大兵攻陳友諒於鄱陽公以功擢鐵甲百戶癸卯
再舉師次湖口公言於主帥曰陳氏兵多土人熟於水
道今方秋湖水尚盛中多灘磧或為所誘則我舟膠淺
難可以逞莫若募其土人潛遣小舟察其深淺險易量
勢而進斯可濟也主帥用其言以聞如其計遂大敗陳
友諒兵甲辰實授天策衛管軍百戶隨大將定江北諸

郡縣吳元年以平浙西取薊州功陞崑山衛千戶階武
德將軍繼從丞相徐公北定中原取東昌公副指揮常
某守之值元兵數萬猝至城下衆蒼惶失措公曰敵衆
甚銳利速戰難與爭鋒當以計破之於是堅壁不與戰
越三日公先以兵數百誘之敵見人寡悉力來攻公與
常率大軍奮擊且出奇兵邀之敵遂敗追奔至棠邑僵
仆載路獲人馬輜重無算公亦身被十數創已而徐公
復還公攻元都克之追元兵出塞而還遂從定幽燕諸

城未下者洪武己酉調守大同攻王保保魏伯章俱有
功已又征和林應州天城白登甲寅破詹童軍生禽僞
官劉平章乙卯擢燕山左衛指揮僉事是後屢征迤北
遼陽破滅營帳綏輯降附威聲遠著戊辰冬以公守禦
邊陲久效勞績特陞驃騎將軍北平都司指揮使追封
其三代公感上知遇益以邊務為任功烈之茂一時邊
將罕與為儺歲戊寅陞後軍都督僉事仍掌行都司使
己卯太宗文皇帝舉兵清內難至大寧得公召見軍門

賜坐親酌卮酒勞之間以安社稷計公奏對稱旨乃曰
天以卿授吾其遂成吾志於是命公為五軍總兵官南
進至鄭村壩首與敵遇即摧敗之從攻廣昌蔚州大同
諸郡無不克捷庚辰夏四月戰白溝河下濟南茂建奇
策敵聞公名不戰自退勅書褒諭陞都督同知未幾公
嬰疾在營文皇帝憂念不置晝遣中使絡繹往問夜則
就勞察視安否醫藥飲食皆出上賜疾篤命還北京文
皇尋亦旋師親幸其第臨問者二公獨以用賢厚民為

勸文皇嘉納之遂以其年十月七日卒于正寢訃聞悼
慟不勝遣官諭祭者七喪塋之費悉出內帑以某年某
月某日葬於北京宛平縣某鄉之原文皇既登大寶錄
序前勞定議贈公奉天靖難推誠宣力武臣特進榮祿
大夫右柱國追封涇國公謚襄敏公之曾祖父諱某大父
諱福父諱泰皆贈涇國公曾祖妣某氏祖妣張氏母泰
氏妻韓氏皆贈涇國夫人公享年六十有九子男三人
忠府軍衛指揮使次恭今後軍都督府都督鎮守鳳陽

次懋今大保寧陽侯佩征西將軍印總兵鎮守寧夏孫男闕人紀羽林衛指揮使昭為勲衛餘皆幼曾孫男闕人狀稱公為將四十年未嘗殺一無辜妄取一財色他將或多以殺戮為功橫取子女玉帛公輒語之曰好生惡死人人所同奚忍害彼之命為已功耶父子夫婦人倫至重又奚忍獨人之父鰥人之夫而奄有其妻子耶於是聞公言而化者甚衆嗚呼若公者其校古良將肯多讓哉宜其厯事二聖生膺高爵沒受大封澤流後裔

益顯而盛則天之報施於公者可謂厚矣太保公之神
道未有刻詞乃以公事行命其子勲衛昭來請銘遂為
之銘曰烈烈陳公虎臣之傑昔事太祖佐興皇業從征
四方如霆如雷無敵不破無堅不摧洎任邊閫勞勤亦
至綏輯降附宣昭德意威馳沙漠風塵肅清勲在明府
忠著朝廷繼事太宗內難是靖宣力効謀屢戰屢勝大功
垂勝公侯弗支公進讜言忠誠不衰宸衷興悼遽失名將
九原追錫實天所相煌煌寵命侈昭崇封翼翼涇國列

爵上公名顯于躬慶流後嗣錫圭旛爵惟公有子惟公有子惟國有臣為國楨幹本公之仁公仁何以不妄殺戮不事俘擄不寶金玉斯實公仁格彼穹旻昭茲錫類以大厥聞哉哉豐碑用揚勲德與國始終永世無極

寧陽侯濬國武靖陳公神道碑銘 李 賢

永樂初靖難功臣不下數十人然克享祿位於悠久者鮮矣惟太保寧陽侯陳公歷事五朝出藩入衛凡六十餘年而以令終嗚呼盛哉公諱懋字舜卿鳳陽壽州人

高祖萬曾祖福三祖大一俱追封涇國公妣皆涇國夫人父亨從太祖高皇帝定天下以功陞都指揮使洪武三十二年從太宗文皇帝靖內難後以功進都督同知卒贈奉天靖難推誠宣力武臣特進榮祿大夫柱國追封涇國公謚襄敏母韓氏涇國夫人襄敏公三子長恭嗣為都督同知次忠府軍前衛指揮使季即公也器宇宏遠識見超卓尤負膽氣工騎射年弱冠即從父領兵為前行凡壩上廣昌蔚州大同白溝濟南之戰與父同

功又禦敵于單橋橐城西寨東平固鎮小河戰尤力累
陞右都督永樂初論功行賞進奉封天翊衛宣力武臣
特進榮祿大夫柱國寧陽伯食祿一千石子孫世襲賜
誥券賚予甚厚六年受詔佩征西將軍印總兵鎮守寧
夏賜寶錠白絮牛羊以為戒嚴之費公至鎮號令一新
凡人之降附者親撫綏之務得其歡心乃已七年選精
兵自將大敗敵于境外由是北兵遠遁邊塵為之一清
捷聞加封奉天靖難推誠宣力武臣進榮祿大夫柱國

寧陽侯食祿一千三百石子孫世襲復賜誥券及貂蟬
冠服錦綺寶鑑八年春上親征北方公將左掖兵十一
年冬還鎮十二年春上復親征公仍將左軍俘馘甚衆
明年還鎮十四年夏有報敵帥瑪哈珠死者公未之信
曰是欲懈我邊備也即申飭諸將固守已而其衆果來
見有備而退二十年春上復北征公率所部兵以從還
京賜玉帶金綺龍衣且聞公有女賢淑禮聘入宮冊封
麗妃尋命歸寧父母賚予駢蕃當世無與為比二十一

年詔公統陝西寧夏甘肅三鎮兵出勦叛兵公率衆直抵賀蘭山擣其巢穴盡收其部長額森圖罕部落及其駝馬牛羊數萬凱還上大悅寵賚有加二十二年復隨上北征師還以公為殿至京遂領前軍都督府事仁宗皇帝登極以公勛戚有勞加太保復官其長子昭為勲衛宣宗皇帝臨御待公尤厚樂安州之平公領京營兵衛士有功還有金帛人口之賜二年復鎮寧夏三年春奏徙靈州城以便防守四年春得玄白二兔以進上賜

璽書獎諭兼有玉帶龍衣馬圖之賚六年還京十年命
佩平羌將軍印移鎮甘肅正統改元今上皇帝嗣位念
公勳戚之舊名還奉朝請十三年冬福建民鄧茂七作
亂僞稱閩王其勢甚猖獗上曰此賊非老將不能平特
命公率師往討之至浙江有欲分兵先守海口者公曰
如此是絕其生路則為死寇矣不從明年春師次建寧
有欲屠沙尤二縣者公曰如此則益堅寇心矣乃下令
諭之俾各復業能斬賊首者官賞與王師同於是降者

日衆公曰賊勢已孤無能為也乃五路進兵一鼓而收之凱還賞勞加等命領中軍都督府事尋兼領宗人府景泰中加太子太師天順改元皇帝復位恩遇益隆固辭官師許之六年春忽得疾踰秋不能起上言臣老死不足恨惟陛下以生民為念任賢用能以圖太平之治則國家幸甚上覽之惻然曰看卿所奏足見忠誠宜尚加調治以副朕懷久之醫藥弗效遂薨時天順癸未七月十六日也距生洪武乙未二月初九日享年八十有

五計聞上震悼輶視朝一日追封濬國公謚曰武靖遺
官諭祭加賙及塋墓事東宮及諸王亦各致祭公偉觀
脩髯語音洪亮胸懷磊落敬禮文士雖位極人臣未嘗
妄自尊大而南征北伐隱不言功當為中興名將稱首
配嚴氏封寧陽侯夫人子男六人長郎昭次福寧次晟
次潤次瑛次昂以是歲某月某日與嚴夫人合塋于都
城西香山之原銘曰壽有陳宗父子傑特涇公濬公後
先開國文皇靖難勳多勛勞涇公輔之首秉節旄奮武

桓桓所向披靡大事垂成星殞于壘濬公承之以篤世
忠鼓勇前馳涇公是同躍馬揮戈到處灑血乃伯乃侯成此
茂烈金符虎節屢鎮邊陲于征于狩無遠不隨閩寇勦
勦東南震恐濬公征之遂輯其衆巍巍勛戚歷事五朝
龍衣玉帶惟帝之褒壽嘏既純允顯大紀容與承平宿
將有幾煌煌愍冊貢此令終生死哀榮孰如濬公西山
嗟哉佳城在側史臣勒銘于載輝赫

漳國忠毅鄭公神道碑銘

楊榮

宣德甲寅二月乙丑奉天靖難推誠宣力武臣特進榮
祿大夫柱國中軍都督府左都督武安侯鄭公薨于大
同訃聞上嗟悼輶視朝三日遣官致祭賜棺及謚命有
司營葬追封漳國謚忠毅某年某月某日歸塋北京之
西山娶里其子能既襲侯爵遂具公平生之槩來求神
道碑銘予嘗叨總史職不復有辭乃為次序之曰公諱
亨世家廬州合肥按鄭氏譜世居歙之跳石元末乃徙
居合肥今忠毅公祖墓俱在跳石歲時遣人上墓不絕

曾祖父五乙祖父大已父用以公貴俱追封武安侯曾祖母劉氏祖母張氏母莫氏俱追封夫人昔我太祖高皇帝龍興淮甸公之先君子自和州率先應募積軍功授平陽右衛百戶陞大興衛副千戶歲癸亥公始襲父職公天資剛毅純篤壬申出使漠北至鄂諾河撫輯元遺還以勞陞密雲衛指揮僉事乙卯秋太宗文皇帝舉兵靖難命公攻薊州時都指揮馬宣城守不下公百計破克之遂生擒宣歸旋攻雄縣討真定俱大克捷陞指

揮使及遼東軍圍永平上親率諸將援之公賈勇奮進
敵遂披靡旋師收大寧陞北平都指揮僉事未幾戰鄭
村壩克紫荆關復廣昌所向無前明年庚辰取蔚州大
同大戰白溝河乘勝遂北直抵濟南陞都指揮同知滄
州之役公軍北門北門芻糧所聚兩軍必爭之地公力
戰破之又明年辛巳敗順德軍於深州夾河決戰勦戮
尤甚藁城西水寨連戰俱捷遂擢兵廣平略地彰德所
至皆下是冬陞中軍都督僉事歲壬午從上南嚮歷取

諸縣及廣平汶上等堡對敵小河麌鋒靈壁擣泗州取
鎮淮渡江克金川門內難既平上正大統策勲頒爵封
公武安侯階勳如前白金文綺襲衣前後賜賚不可勝
計永樂癸巳夏奉命出關巡視山川險易撫輯軍士時
關外軍衛統攝無紀遇有邊警猝難制敵公因奏調大
同前衛帶管東勝等衛措置得宜自是各衛皆從所隸
以聽調用尋奉勅領士卒築長安嶺城規畫有方人不
知勞未逾月而城成歲庚寅以來上屢親征北方公扈

從每著勞績仁宗皇帝嗣位念公舊德特命佩征西前
將軍印充總兵官鎮守大同嚴斥堠固屯守北騎遠遁
不敢窺邊居常以清介自將服食之奉泊如也用是下
人母擾邊境輯寧宣宗皇帝倚任尤重屢降璽書褒異
之公生元至正丙申至是享年七十有九配夫人張氏
子男三人長即能次熙次嘉女工人孫男一人孫女一
人於戲自古帝王之興必有才謀智勇之臣為之左右
以戡靖大難垂不刊之典故其子孫世世有爵邑與國

咸休永無窮之聞焉若公遭遇太宗竭誠効力奮不顧
身崎嶇戰斬以佐助翊戴奠安宗社迨扈從北征鎮安
邊陲其竒能偉績輝映後先者何其盛哉是宜勒銘豐
碑昭示後世焉銘曰於皇太宗有臣忠毅克殫心胥助
順舉義崎嶇戰陣奮不顧身祗奉神謀用成大勲皇帝
曰吁有臣如是惟天所生皇考所遺從征沙漠屢效驅
馳出鎮邊陲敵不敢窺長安之嶺其城萬堵營之築之
士不知苦咸福遐齡逮事四朝功成不有位高不驕天

不憇遺殞傷元老輿論興嗟聖情悲悼聖情悲悼慨念
元功式昭褒典賜謚追封娶里之西西山之麓鬱鬱松楸
佳城是卜紀行有史銘功有司後百千祀視此豐碑

武進伯朱公神道碑銘

羅亨信

洪熙元年乙巳秋七月三十日征敵前將軍總兵官武
進伯朱公以疾卒于遼東之鎮所訃聞皇帝為悲悼輶
朝廷臣皆縗素越明日詔禮部遣官諭祭賙贈其家
定議追贈公奉天靖難推誠宣力武臣特進榮祿大夫

柱國武進侯謚忠靖九月喪柩至京十月九日賜地塋于宛平縣京西鄉盧溝橋之西原既求翰林學士曾榮誌其塙迄今二十有一年矣其家嗣今大同總戎襲封武進伯冕大懼公之豐功盛烈弗白于世又慮乎後人或怠於進修則無以報聖恩而繩祖武也於是泣持叅謀戶部右侍郎沈君仲威所具事狀謁予撰其神道之碑予以衰陋出巡塞北辱愛於總戎甚厚義不容辭按狀公諱榮字仲華姓朱氏世為充之沂州大家元季擾

攘田廬蕩盡承平奉二親來歸艱難營養不失其歡公
賦性剛毅體貌豐偉少負奇氣年未二十膂力絕人初
同父僑寓表伯葉氏家葉間戲曰男子非士則農商以
自立胡為托迹于人而不思所以振厲公曰人亦奮發
有時大丈夫又安知他日不為都督乎聞者甚狀其志
無何朝廷下令四方舉年少傑特之士以備任使郡以
公應詔而起擢為府軍衛驃騎舍人實洪武九年丙辰
也武藝日修嘗備宿衛尋授卒長領騎五十人時鎮南

諸夷初附跳梁未輯歲辛酉命大將西平侯帥師往平之公從征大理金齒百夷建昌烏撒烏蒙諸郡壬戌復征積有勞效授世襲百戶戊辰征金山伊爾們河哈勒哈之地明年己巳陞大寧前衛左所副千戶創建城池撫綏士卒己卯秋會太宗文皇帝舉兵靖內難十月駕臨大寧公審知天命已有所歸遂率所部詣軍門謁見大被賞賚即陞本衛指揮僉事扈蹕還至鄭村埧遇敵大戰又奪九門進都指揮僉事繼取廣昌庚辰攻蔚州大

同戰白溝河濟南皆勝陞都指揮同知又克滄州東昌
辛巳決河藁城兩大戰皆捷進都指揮使壬午克東平
汶上肥河敵皆披靡既而收兵復戰公率精騎伏險大
破之復攻小河靈璧泗州渡淮克盱眙下揚州招撫鎮
江敷宣德意人皆按堵下六月渡江入京上登寶位太
赦改元論功行賞授公左軍都督府都督僉事參貳元
僚聿新政化永樂四年交趾黎季犧肆為不靖毒痛生
靈上命征夷將軍英國公帥師往討其罪公翼贊元戎

大建勲績六年渠魁既得起陞左都督明年餘孽負固
搆亂公復征遂平西東兩都列其地為郡邑置守令撫
循其民設三司以鎮焉師還受賞八年春北鄙餘衆屢
剽我邊人為弗寧上親率六師以勦之公隨征至玄冥
河追逐部長布尼雅實哩至紅山口靜邊鎮敵乃率衆逆
戰公獨鼓勇取勝遂亡命奔遁遷左都督十二年復征
於和林蒼厓峽衝入其陳大破約羅之衆師還是年冬
命征大同鎮守都督操軍馬守禦邊疆敵人聞風遠遁

西北以寧十五年召還十六年命鎮遼東嚴斥堠謹烽
火東徼晏然二十年復征北方公由東路兩與之遇奮
勇破敵俘獲人馬牛羊而還二十一年七月進封奉天
翊衛宣力武臣特進榮祿大夫柱國武進伯食祿一千
二百石子孫世世承襲頒賜誥命鐵券褒封三代眷遇
日隆屢掌府事政通人和中外譽之二十二年復征北
方回還仍鎮遼東洪熙元年仁宗昭皇帝嗣位簡任老
成分淮邊鎮謂公惇實有古將才是年春遣使持征敵

前將軍印綬授公充總兵官鎮守其地思惟付畀之重
整戎伍撫士卒期罄丹衷以無負委任詎意夏六月忽
疽發背馳奏京師遣醫往治弗效竟卒凡將校士卒莫
不悲泣如喪所親距所生己亥六月九日享年六十有
七公之曾祖父成大父德父原賜初皆封武進伯追封
武進侯曾祖母葉氏祖母濟氏母施氏俱已卒配楊氏
初皆封武進伯夫人追封武進侯夫人子男六長即冕
襲封武進伯正統四年命佩征西前將軍印充總兵官

鎮于大同文武兼資慈祥愷悌綽有父風娶陳氏封武
進伯夫人次敬次果次昇次昌次昱孫男十五琦瓊瑛
璉璋璘琛璁冕之子瑾璗璵璸敬之子理昇之子璽
昌之子嗚呼予聞公之為人謙退而能容有功而不伐
運籌決勝之方素所講習每同大將東征西討推鋒破
敵惟殲其所當誅未嘗妄戮一人恭承閭外之寄思以
遠圖不僥倖以取功徼詭而成名孜孜以安輯為務
所至兵民無不仰戴由其宅心平恕智識高明才力超

邁所施靡不咸適其宜視之古人信不多讓矣豈非治世之勲臣中興之名將歟是用紀其本末勒諸貞石以垂無窮焉繫以銘曰聖人御極簡拔豪英公起畝畝卓犖崢嶸俾長卒徒殲厥南服大建奇勲乃有世祿廓清沙塞武備游膺出守雄藩是曰大寧屠維單閼內難斯作皇秉天戈奸回戡削遂登九五肆攬乾剛四方萬國莫不來王公功最多官登都府贊貳戎樞闡揚威武股肱心膂為國干城雄才遠畧中外咸稱南越既平朔方亦

定伯爵進封榮膺顯名丹書鐵券簪紱煌煌崇德報功
恩數異常鸞誥再頒光昭祖禰胙土分茅山河帶礪屢
承閭寄寵眷益隆荷德感恩誓竭其忠一疾弗瘳溘爾
云逝當寧曰噫元勛已矣追惟碩父錫謚加封襲其冢
嫡復總兵戎賜塋京城西山之麓封築孔堅巍巍夏屋
穹碑載樹勒此銘章永利後人百世不忘

明名臣琬琰錄卷十七